


0
1cm
2
3
4
5
6
7
8
9
10
11
12
13
14
15
16
17
18
19
20
21
22
23
24
25
26
27
28



浙江圖書館



浙江圖書館



浙江圖書館



浙江圖書館

皇明名臣琬琰錄卷之十六



右參政顧君墓表

左參政段公墓誌銘

左參政靜菴李公墓誌銘

右參政楊君墓誌銘

右參政項公行狀

雪峯秦先生墓誌銘

趙君孟希墓誌銘

黃君易菴墓誌銘

鄧瑯

王世貞續編



李東陽

李傑

張治道

邵寶

李東陽

林俊

浙江圖書館

右參政郭君墓誌銘

毛澄

東川先生行狀

右參政吳公墓誌銘

文徵明

右參政李公墓誌銘

王雲鳳

右參政郭公墓碑

右參政張君墓碑銘

右參政華君暨配合墓誌銘

邵寶

右參政吳君神道碑銘

周用

左參政朱公墓誌銘

李夢陽

左參政陸公墓表

邵銳

浙 江 圖 書 館

河南布政司右參政進階嘉議大夫顧君墓表

李東暘

吾友雲厓顧公君母喪時廬于姑蘇周山之墓予歸自湖
南夜抵廬下呼而起因歎世所旌廬墓事多文而寡實雲
既不自銜當時有司亦無能旌之者後三十餘年知府林
世遠始旌于朝未及報而雲厓卒矣予故表于其墓特
舉其大者先焉雲厓姓顧氏諱福字夫錫雲厓其所自號
世為江東著姓曾祖某祖某皆隱於鄉考諱賢以工籍隸
順天之大興後贈儒林郎光祿寺丞雲厓以成化乙酉舉
鄉貢丙戌登進士第歷刑部主事員外郎郎中調永州府

同知遷知吉安府擢河南布政司右叅政分司南陽致仕
卒初在刑部劾甚著錄囚山西多至七千餘衆平反者六
十餘人前後四十餘疏多見采納每攝他司事事皆立辦
勘獄浙江發巨贓七千餘兩時錦衣千戶吳綬勢甚熏灼
勘獄者皆徃受成議雲厓獨不徃會下詔獄遂摘其疵誤
出永州受檄決獄至蕪湖郡有部檄徵茅茶香艸雲厓計
合藩所徵全數上疏請停之至吉安承大猛後稍濟以寬
劑理繁錯不動釁氣而條緒具舉張都憲公實周都憲時
可劉侍講景允皆慎許可特稱顧君獨不善事上官或以
簿書相窘然即所治校之諸郡不啻蕪之矣陳時政六事

時議躉之叅政報至民兵數千人遮道泣送府及千戶各
所留一鞞以表去思南陽 宗藩軍校多不戢每用理斷

亦無怨辭撫徠流徒復業者四千餘戶條諸葛武侯廟及
閱武場開拓有加其去也以老疾名蓋郡人在言路者以
私請弗獲故陰為媒藥而其藩人猶惋惜不少置雲厓乃
自歎曰藩不負吾而郡負吾賴幸有二三知己者存尚何言
哉知己者張劉周也雲厓既歸日與鄉大夫士觴詠為樂
足不至公府手不操書札惟歲時以詩音與未病前一月
猶然嗚呼詎意其遽至此耶雲厓尚意氣故人潘郎中琚
客死斂葬之其子鼎方十歲携以自隨比長以女贅之又

置田廬于蘇居其寡孤後鼎舉鄉貢卒于京又遣人塋之
趙知府禎沒又以次女妻其子鎬尤篤倫誼弟祿早世塋北
土者二十年亦祔祖墓卹其蠶婢不貳志今旌為節婦事其
兄光祿丞禎甚謹嫂欲析居即俯孫于外泣告于兄乃得
歸然引咎自責未嘗一以語人人益難之而廬墓事尤大
且著云雲厓娶李氏封安人五子長問次闔閱又次閨聞
側出女一雲厓生正統戊午某月某日卒於正德戊辰六
月二十一日壽七十一是年某月某日塋

江西左參政段公墓誌銘

李傑

弘治戊午秋江西布政使司左叅政段公進表至京禮成辭歸以疾卒于正陽門崇真觀之寓舍八月七日也播紳大夫咸驚担徃吊以公不至大用為惜己未秋九月

日子豸將奉柩葬

以光祿少卿李君之狀來乞

銘予與君皆段公同年知其言之足徵也乃據狀叙而銘之公諱正字以中別號介菴其先澤州人祖占籍錦衣遂家京師考善封監察御史贈荊州知府妣常氏封孺人贈太恭人公穎悟夙成七歲能屬文弱冠游順天府學提學御史見其文驚異之戎籍食廩善自公始成化乙酉以

易經魁京闈鄉試丙戌登進士第戊子授直隸元城知縣
俗素強梗公取其尤無良者置諸法人始知懼 秀府

之國道經元城後者聞公威望噤不敢索賂時公年富力
強剽繁治劇綽有餘裕巡撫巡按官咸以其政績 聞


壬辰召拜江西道監察御史凡所陳奏皆持大體閱急務
每見施行出按河南首執治貪黠知縣一人郡邑屏息有
望風解印綬者奉勅查理大同糧儲親歷邊倉爬梳宿弊
舉劾甚衆繼按江西荒歉之餘救治約束動中肯綮歲將
滿鎮巡及三司官皆上疏請留 詔再巡一年許使且行
事興革利弊犁然當於人心監試鄉試親綜庶務去取

惟公是科號稱得士辛丑起拜浙江按察副使浙西大水
督諸郡治之水不為害豪右武斷者一皆繩之以法坐前
按江西瑞川民以計殺其讎勘報延綏降授郴州府同知
丁外內艱服闋改任汝寧時知府事者科罰太重公堅執
可不十歲三四民歌誦之上官交章舉公屈在下僚弘治
乙酉擢荊州知府荊州在遼府封內宗室撓法政弗克
行公䟽陳之詔遣內外大臣往治其實上命安置松
滋三將軍於鳳陽遠安長陽兩府諸將軍中尉皆削官祿
附從者悉隄邊郡內以寧湖廣達吉興岐雍四府公受
委協贊功克易成壬子乙卯兩為鄉闈掌卷官禪益良多

三載考績治行為天下最賜誥旌異丙辰擢江西左叅政
士民間其復來無不欣慰嶺北九江多盜南昌湖東健訟
公歷守其地事皆刃迎縷解殛撫州害民之豪獲贛州累
年之盜平南昌市估均廣信夫後所至家受賜而人感惠
蓋公在仕途三十餘年其政績不能悉書然於此亦可槩見
矣其為人孝友忠信廉介慎勤嗜讀書喜為文無他玩好
御下甚嚴未嘗假以顏色案牘簿書躬自檢閱黠吏無敢
欺者所著有介庵集三十卷宦游記聞十卷栢臺公案十
五卷諸程日記三卷歲于家公生于止統辛酉享年五十
有八配周氏封孺人加封恭人子一郎彥娶焦氏孫女三

長許聘四川恭將魏啟長孫餘在室嗚呼公之行已蒞官
卓卓如此亦可以無愧矣其年不至期願而位不至台鼎
斯則命也為之銘曰

偉矣段公維國之楨敷歷內外聿馳駿轂維明維剛政以
克成有材連抱宜棟清廟忽焉摧折朝野傷悼民之無祿
尼公遠到惠愛在人著述有文雖云亡不亡者存曷以表
之視此刻珉



浙江圖書館

明大中大夫山東布政司左叅政靜菴李公墓表

張治道

公諱崙字世瞻別號靜菴自古臨潼人高祖德曾祖昇昇
生祖思忠思忠徙居咸寧生父海以公貴累贈中憲大夫
母張氏贈恭人以正統甲子九月十二日生公卒弘治甲
子六月二十九日享年六十有一卒時同門戶部尚書近
山劉公璣銘諸墓卒四十七年為嘉靖庚戌壻巡撫山東
右副都御史平田管公揖欲表其墓以治道為姻戚之末
迺以文委治道不敢辭遂為文曰公生有穎資年十八克
西安府學廩膳生文詞勃勃莫之敢並大為郡守余肅敏

公所重嘗贈以詩有曾向關中識白眉之句以經中成化
乙酉鄉試已丑進士初除山西屯留知縣屯留號難治難
治在壬文弄法上欺官府下害良善十數年來獄訟錢糧
皆出其手吏供使令官聽調發公至先縛其主文案其奸
弊得十餘人悉捶死而縣治始清法令不擾豪強畏如神
明善良親如父母在縣三年一毫不取廉名四振官燭不
點他可知矣至於興學校脩禮樂正風俗時婚娶治行為
天下第一陞戶部河南司主事轉山西司員外郎郎中在
部十二年除積弊革奸猾錢穀出納一毫不爽一時居部
者無出其右名動京師陞盧州府知府治盧州如治屯留

而法令稍寬詞訟兵甲錢糧無不克舉賑荒救饑所活萬
餘人民不憂旱蝗不入境立俵馬之法定鹽鈔之價創河橋以
免民溺廣積穀以備賑貸撫按交薦聲譽赫赫陞河南布政
司左叅政去任之日婦女痛號百姓遮道脫靴識愛立碑
頌德治平循良前後罕見甲寅丁外艱居喪三年不出門
戶丙寅服闋復除山東布政司右叅政未及丁繼母憂復
回守制服闋將起而瘡病作矣作四年竟不起嗚呼惜哉
河嶽鐘靈既生之而復奪之邗嘗聞聖賢之生閔氣運之
盛衰而道之行違繫一時之機會要非人力所能為也以
公之才賢加以年公輔可到伊傳之業不足舉也而年

位止此豈非世道之不幸邪公貌不踰中人言若不出口
判大事決大疑重如太山沛若江河有介不取之廉有萬
人無敵之勇故近山銘公曰行不媿影寢不媿衾公固自
謂人亦云云近山與公同為李介菴門人介菴閔西夫子
也道學淵源有自來矣許襄毅嘗謂人曰人知李世瞻有
伯夷之清而不知有管仲之才當時言官薦公有聖賢之
學王佐之才人以為的論公沒貧不能葬鎮守大監劉瑯
重公名迺謀諸巡撫都御史許公為舉葬事而西安知府
馬炳然為董其事甚嚴亦罕有也娶郝氏有丈夫行亦封
恭人生子五璋珪琬琰瑤璋為府學生娶王氏珪娶趙氏

璇娶張氏俱業商琰瑤俱幼女二長適平田公封淑人次適
大竹知縣种公子雲漢為府學生今為秦府伴讀能古文
孫男二梅挂孫女一存公於子不甚教獨嚴擇女配人問之公
曰人各有性心各有志非教所能強也強之不從則害天性
矣女配不良終身怨焉故於平田既觀其行為又試其文
藝曰公輔器也將來必大成遂以女妻之今果然矣人以
此服其藻鑑云治道妻祖山東德府紀善田公銘於公為
姊夫嘗述公之良治道得聞焉故知公之詳而表公之切
觀者幸勿與納賂而厚誣者同而弗信焉



浙江圖書館

明故浙江布政使司右叅政楊君墓誌銘

邵寶

正德丁卯十一月某日浙江右叅政楊君以疾卒于官先是
予往視疾君強起坐伸吟中猶及國事予謂君志尚未
衰即為延醫吳中醫至而君卒嗚呼悲哉越數日其子江
等來自山西將奉其喪歸遂以揚杭州溫甫狀來請銘予自
弘治甲寅識君戶部迄今十餘年相知為深今又與聞君殯
事銘其能辭君諱竒字秀夫姓楊氏別號松坡山西潞州
白林人也其先自平定州徙今居凡若干世矣以畜蕃息
號萬羊揚氏高祖雲曾祖源祖潔繼業而隱至其父能以

鄉進士選武昌同知擢東昌知府母宜人牛氏君穎敏絕
人十歲能文有老成語長老稱為奇童弱冠各起諸生間
成化庚子中鄉舉高第錄有刻文明年辛丑得進士授戶
部河南清吏司主事簡使犒軍于獨石督鹽于長蘆受
芻于京場選縉于內帑廉公平簡後先一軌戊申弘治改
元君應詔上裕國安民疏未幾奉勅處置居庸紫荆
諸邊關軍餉君上疏極言足食足兵之法在端澄本源有
浸貴近語道聞繼母趙宜人喪即日奔歸繼丁東昌公憂
壬子起復為福建司主事癸丑進四川司員外郎有淮揚
督漕九江造舟河南視菑之使具建聲蹟甲寅進陝西司

郎中時其肅弗靖君奉 勅整督軍餉將行上䟽言邊備

七事 上嘉納之至則今太宰許公以都御史撫其地與

君同事許公素器君於是益重焉事竣還 朝有白金

文綺之賜大司徒周公以君才任劇調雲南司尋以薦擢

守嘉興改夔州夔在四州地僻民靡君為書諭之俾孰孝

友尚禮義延問父老民所苦與所利即罷行之月朔視學

進弟子問業有師道焉人士咸慕至作生祠民飲江水以

遠汲為艱君議鑿玉井出郡門數尺即得美泉民以君姓

目之居五年擢兩浙鹽運使剔弊講利方有績劾前太宰

公以浙事簡改君兩淮君以浙治之升鹽賦五十餘萬崇


壙固藏人無虞焉明年擢叅政講畫經理將有施設而乃
止是知者重惜之君性孝事繼母如母軒坦爽朗不妄笑語
政暇輒讀書晚好史漢及韓柳文且以課子君面白如玉軀幹
魁偉鬚眉秀麗君子君謂才畧於是為稱君卒距其生為春
秋五十有幾配王氏封宜人側室李氏有男子五人長江次潛
漑澍沂女一適貢士澤州裴爵孫男二夔鳳墓在某村之
原其葬之日為卒之明年某月甲子銘曰

事以才濟其充在氣氣正則宏宜廣厥施公庸弗地公享弗年
可知者人可不者天忠言在 朝惠政在野西餉東醴罔不
效者君纘將屬其氣勃如將為雲噓將為雨濡公有孫

子君慶萃止公終弗終其發伊始



浙江圖書館



浙江圖書館

明中奉大夫江西布政使司右叅政項公行狀

狀曰公諱經字誠之姓項氏上世故洛陽人曰宏度者公九世

祖也宋室中亂避地嘉興遂家嘉興蓋嘉興始有項矣宏度

生儀甫儀甫生伯通伯通生達卿達卿生永原永原生邦

邦生衡世有令德闕弗施而生子忠忠舉進士為刑部主

事土木之變主事從英皇帝北狩矣歸而進郎中屢遷

兵部尚書有大功于西邊還定荊襄卒謚襄毅襄毅性剛

果任怨身犯難者數矣乃卒全功保身敷錫胤嗣卒之日

詔錄其子若孫為千戶世世弗絕云襄毅配鮑夫人

生二子為公長也次曰綬公生而哲靈八歲即善記誦少

長郎善文辭一時之士學記誦文辭者無弗推服公也比弱
冠以蔭入太學遂就試太學太學諸生又皆推服公也為太學
生者四年而當成化丁未是年舉進士明年授南京福建道
御史奉命簡閱內庫內庫者豪貴所潛也公既至循故
實稽錄羨餘內庫無敢冒利者比又視南城南城人無敢夜
聚按江表江表寧凡上章論利害者十一皆宛曲盡事體
不務皦皦名故人亦莫可知也已為御史者又七年而陞太
平府知府知府至則嘆曰嗟乎太平建康南屏也左江右淮
雄據三面實惟國家股肱郡然太平民貧矣不寬不可
於是身拊循之凡流亡來歸者萬計彭中丞禮刑御史鳳

交薦于朝而襄毅公逝矣乃公奔喪回太平民留者充道道
不行公泣而諭之乃稍稍引去而公廉程馳回悲殞號極幾
不生凡六日而後食飲人弗強之弗索也是非其至孝若是
哉服闋赴銓部移治臨江臨江與袁筠諸郡接壤也土寇漂流
出沒其間前有率玩曷慮他變弗敢動民無休居公至憫然
曰夫臨江與太平異也寇弗擊民弗寧乃立捕諸豪賊百八
十人按之一郡肅然時戶夜扃矣逾年臨江大饑米石千錢
有司方請賑公曰民饑甚矣必請而賑是含口以待斃也賑
而弗請罪在太守太守寧以一身活數萬人于是發府庫金
數千建和雜之澶民賴以存者無筭而監司督賦方急公入

諍曰化理民命為重民憊矣以杖驅之是束羊加石而沉之淵
直速死耳民盡死賦從何出太守死不奉命太守死不奉命
監司怒繼而歲太稔民感德報稱賦纒纒然入恐後矣卒為
諸郎先監司悅時中官瑾用事權擅天下天下吏妻賂中
官瑾者其有司以上賂各有等也公弗賂中官瑾怒或
以告公公曰乃人各有志也彼烏怒即怒吾命耳卒弗賂也
然心知禍之及已尋乃移治汀洲公曰禍止是吾幸矣迺即
日之汀州臨江民留之猶太平也已治汀州者暮月政盡舉
迺卒檄公致仕汀州民留之猶臨江也已公即夜遁去中官
瑾怒未已也時公弟綬為千戶者進指揮矣而又從征廣右

有功於是矯詔縛綬編戍遼陽居無何中官瑾誅諸賂者
皆敗臺諫薦公抗直可大用公曰吾乃今可休矣夫人處世
若飄風耳吾五十餘矣吾寧千里為吏俯仰人作強壯態吾
孰若林臯自怡也乃自號悟菴翁具疏請老 上允之授江
西右叅政蓋致仕者又十年而當 今上登極壬午又七年
太禮書成俱推 恩天下詔兩進階至中奉大夫云公生于

景泰壬申卒嘉靖己丑享年七十有八娶趙氏繼田氏王氏
子男三長鏞郎千戶今從征交南次鎧鴻臚序班次錫刑部
主事女三長適南京左府經歷呂言次適應峻次適太學
生沈維鏐孫男四元淳元深元淙元濬孫女七方公之卒也

應峻奉使江右道嘉興子鏞亦以奏 凱故歸省錫在

告皆得周旋以訖終事可謂無憾也已峻又嘗聞公之教其
子曰夫起家者猶治田爾也項氏之先有厚畜矣至我襄
毅公闢之樹稼穡焉而守于予夫善守者未必有終也小子
識之其毋忘爾祖矣嗚呼言猶在也公風度爾雅不細謹美
鬚長大其處父子兄弟皆可誦說方少時襄毅公遭讒屏居
公亦夙夜抑畏懼遺父憂比為御史而弟綬以指揮署蘇州
衛公令綬奏署嘉興所以侍襄毅公猶已在綬亦善事襄
毅公若公在也襄毅公卒時又有幼子矣公周悉撫愛訖
有成立襄毅公廢無所遺即少有遺公盡分授之弗私也

教子嚴而有方初公為舉人居鮑夫人喪比又居襄毅公喪
皆善執禮不隨俗其子弟無敢弗執禮居喪隨俗者迺昏娶
不論財其子弟無敢論財者居常不私謁郡邑其子弟無
敢私謁郡邑者方仕特逆瑾播雷雷奔烽烈無敢近公乃
抗節自表見人卒莫能害蓋亦有天幸焉及朝政湔濯
起廢之日乃引身家居是豈避難而止知進不知退者哉公
素疾矜伐弗自敘述應峻生也晚從子鏞等得其大者而
弗詳也然公之風因以著矣鏞等將以公卒之年月日葬
公子山惟是墓中之石所以垂示久遠鏞等方匍匐稽
首詣元老以請惟採擇而存之使亡者事行弗泯此恩

德至厚也謹狀



浙江圖書館

靈峰秦先生墓誌銘

先生諱文字從簡號蘭軒後號靈峰其先閩人也自閩徙
台之黃巖再徙臨海遂為臨海人曾大父諱世珙大父諱
宗傳父諱盛字彥彬號復齋以先生貴累贈刑部郎中初
宗傳無子有青鳥集庭下遺二卵而去已而生二子次即復
齋娶董氏生先生及僉事禮繼娶吳氏生祺及禔及御史
武云先生生九齡而董太宜人卒哀慕不能已稍長輒知
孝事復齋公復齋公性嚴毅務得其歡乃已弱冠以舉業
聞堂堂然出人士先矣猶與靜學戴先生輩為道義交益
務進脩不怠弘治壬子以毛詩中浙江鄉試第一士論服之

明年癸丑登進士第觀政二年授南京行人司行人三年
轉司副四方從游之士戶外屢恒蒲既備考得歸省矣未
至而復齋公卒哀毀幾無以為生正德中服闋始遷刑部
廣西司郎中時劉瑾之亂羅織京朝官刑曹易染尤甚先
生以身殉法不少貸讞獄精明老吏皆自以為不及瑾竟不
能害未幾遷貴州提學副使貴州學政頗簡類兼清戎糧
餉等務先生於養士外又有區處方畧軍民便之踰年以吳
太宜人憂歸服闋仍改陝西先生之兩以憂歸也借宅以居
蕭然無長物終喪三年守禮勿越至遇國哀必朝夕臨儼然
如制而止其兩為提學也以身為教親為講解大要以抑奔

競黜浮薄為先兩地士習為之丕變初先生之未拜貴州也揚冢宰又欲以江西啗之要之來見竟不從自陝入覲也屢倖錢寧孫安廖朋各以其故來視輒謝不見後亦不能害之在陝二年遷河南布政使司左叅政陝人咸以先生海內鉅儒置所宜處頗有遺論焉抵任觀河洛居民蕭條甚而武宗巡游調度日急慨然告病以歸撫按知不能奪以聞于朝有詔恬退可嘉許之於是先生年五十有六矣餞送之者一如在陝時亦一無所受後先歷官三十年而一介不苟持之益嚴蓋其天性然云之先生之歸也杜門謝客足迹不及公府日惟教養子弟波及鄉之後進焉自家食以

至行人時五經之士各為指授矢口成章士爭錄之不逮
今書坊多版行之者若幘東集木車集閩中稿及諸藩鄉
試錄文又不與焉為文根抵經史下上程朱不達其意不止
嗚呼旨哉先生體貌顯重詞氣和平不問而知其為成德
君子其學術甚正而仙釋之說一不入於心復不為近世門
戶同異之習而士益就之自其出也以及其歸老也上章
薦之者比肩而其志獨不奪其所得者終不與易矣嘉靖己
丑冬忽感瘋疾不愈竟以今年辛卯九月二日終于正寢距
其生成化乙酉十月十有六日也年六十有七娶姚氏累贈
宜人有淑德生子八人男五俱殤死女三長適應叅政大

猷次適戴亳州時弁即靜學子次適縣學生王梯雲繼娶
揚淑人楊淑人無子議立僉事子鳴雷為嗣今甫十四歲已
為諸生云僉事子登科者二人御史子及諸弟子為諸生
者九人實自先生成之是歲十月十有七日鳴雷議於北山
先墓之次啟姚且人之窀穸而合塋焉虛其右又以淑人命持
亳州所為狀來屬度為之銘度惟先生之沒不惟台之憂
天下同惜之矣以彼平生且有付之名筆而所持以不朽
者則不在是度雖不獲及門執弟子禮而嘗竊奉教於君
子矣其盍敢辭銘曰青鳥發祥秦氏以昌彼美復齋百夫
之聖薦生靈峰其德孔良天不愛道錫之文章其文維何

豈曰決科道德之蘊摘為天葩上穿六籍下蒐百家開門
授徒其書蒲車留都之使是曰具官謂予素食功在衣冠載
遷郎署執法桓桓爾瑾刑餘而我敢于推 帝念之且表
多士士有負公其顙有泚來旬來宣河洛竭矣古亦有言不能
者止 帝錫之歸風此畏途脩然遠逝賢哉大夫卧病十年青
矜有那何以貽之忠孝是圖維兄及弟亦有猶子奮翮青雲
可謂濟美如彼力田教之樹藝曰歸自秋以有稷黍我思瑯
邪繩孝動天覽既有子佩刀以捐亦有呂氏文穆稱賢臣姪可
相文獻以傳嗚呼有家始于一人一人之積豈不既勤北山之石
斲絮何云敢告子秦念茲于春

明故江西布政司左叅政趙君孟希墓誌銘

嗚呼孟希予禮部所舉士又奉

李東陽撰

詔授業翰林見其性行醇謹文采內蘊不外飾心愛重之及
登諫垣橫罹廢黜惜之不少置起佐藩省陷賊中比脫難遂
搆疾以死又為之慘然以悲曰孟希固止是哉孟希之子中
道為刑部郎中既聞訃奔歸襄事請予銘銘未及而塋越
三年乃克銘追而納諸壙孟希諱士賢孟希其字荆之石首
人也舉成化癸卯鄉試其舉進士在弘治癸丑被簡為翰林
庶吉士初命為戶部給事中丁母劉孺人喪服闋改授兵
科累遷都給事中前後所上疏如廣聖聽躬儉德省賦

稅厲士風及選帥練兵令勲戚子弟入國學禁道流為太常
正官皆切治體有都御史子冒功乞陞者劾沮之出使蜀楚
遼諸府不受餽遺覈大同邊儲力去姦弊倉官待支多老
且死者曲為區處俾生還鄉邑後遇諸塗皆泣送不忍去逆瑾
竊政不悅于都御史雍泰據嘗薦泰者孟希與少師馬恭
毅公太子太保東山劉公輩俱落職為民瑾敗乃復起為江西
布政司左叅政時盜方熾按行郡邑夜宿新淦賊突出
山澤為所擁義不往諭以禍福賊羅拜曰我輩安敢犯公
惟籍以自庇耳且擁且行至會昌賊所過殺戮孟希輒止之
曰若等與彼皆吾民吾民牧也汝欲殺吾民寧殺我耳賊為

少戢江西人氏類能言之會官兵四集孟希乃得出歸藩司
病瘡旬再浹而卒是為正德辛未九月二日距其生天順庚
辰正月九日年止五十二壬申十二月九日葬于江子口
北母墓之次起之先本涿人宋初徙長沙湘潭元季始徙
石首曾祖葵為四川達縣丞娶揚氏少保文定公女弟也
祖遂廣西巡檢父蓬州學正封戶科給事中封君生四
子孟希最長次士能士俊士偉令各習一經孟希以書舉
士俊以詩舉丙辰進士為長垣知縣孟希娶魯氏封孺人
二子長中道亦以書舉乙丑進士繼為庶吉士今改署戶
部郎中謹厚類其父次中渙女一適

府同知袁宗夔

子襄孟希素孝敬罷官時以養為樂其沒也有遺憾焉曰
吾所以不死賊者以吾父在也士俊卒于官適使過長垣
為治後事以歸夕處要地家無贏貲常貸粟為食翰林
檢討易君舒誥為著行狀 于石首富商朱氏蓋所嘗受
貸者也銘曰

行罹于凶弗殞厥躬壽則弗延又誰使然兮歸復汝形
復瞑厥靈其猶後我銘兮

浙江

明亞中大夫廣東叅政烏門黃君易菴墓誌銘

林俊

易菴諱顥字伯望龍坡烏門黃氏上世見予記其祖教諭
公諡廣元生祠父封員外郎公綱墓誌君沉毅內植外美
無足動人起進士為戶部主事機神開朗疑難徐折一言
而定同事目為老斷留心政理繙閱部牘叅格例以備知
國計委輸京儲而權舟臨清也部為之一重減畹賜第復
造君䟽止曰臣為祖宗措法為朝廷惜財為某家措
福孝廟陰納而中其䟽周公經為戶部尚書擇賢自助
得今侍郎邵公寶與君掌章奏同心在公奏駁無擇柄要

部事改觀周用以不安于位君內艱服除復為其部員外
郎轉郎中與長異意出為肇慶知府治以廉平恤孤禬抑
豪右行雜平為民當怨繩蕉布官市之擾溝黃桐圩橋之
水不害稼號黃公溝特廣盜幾徧而肇尤盜區獻計者
欲屠而盡君曰吾玉石分之諭諸落無為盜襲故者群械
之肇人神城隍神令誓無仇方師聽之無悟方當以汰繫
以待讞三數年間獄死數百大肇得以不煩大師以帖安
其雞犬人稱快鎮巡屢最其績以旌表仕者入衛師某之
賂歆代官養子君持不可會外艱去撫君治盜坐以酷屬
所私諭意賂免時賊瑾羅織禍動連身家知舊強君曲

處無能為副仕竟聞君業伸辯自度無能携槽槽然如夢
至抗而返就獄甘心焉一日忽出君復其職則知御史劉
君祥劾仕受賕數十事首及君寃君白而仕逮繫補武昌
未數月擢廣東左叅政連推右轄竟以仕吠滕其聲部不
獲已更其任至潮病以弗起正德乙亥二月二十九日也
年五十三嗚呼士固有弗終者矣方仕媒孽時如墮湯火
容玩視耶蓋棺事定數百年短屋歲食僅裕可欺也耶
君治肇無繼者治武昌無前者治廣無為並者斯名仕
夫私論與下屬萬口而同者也仕固足信哉君介特有識
崇尚風教包孝肅陳白沙皆為立祠陳君茂烈若行兩許

其子以女割田周其族皆所謂難者許君可任大事今矣
矣失君者獨人然哉配鄭封且人有婦行僅生二女子應
軫與三女出唐應庚出張後君十月不舉丙子臘月甲子
祔先負外廣化右臂以葬鄭君岳君趣味者狀甚詳予獨
悉仕事告失君者銘曰 嗚呼易庵群和獨指吾無容為
子之所廣屋一漏厥庇孔委吹毛刮垢亦如子何青蠅加
点其然其然合抱寸朽吾子之冤其日其天

明故大中大夫四川布政使司右叅政郭君墓誌銘

毛澄

郭君以嘉靖庚寅正月十四日卒其年九月二十日葬郡
城東厚河之原厥嗣從朴奉御史藍玉甫所著狀請予銘
於乎君之歿也予慟之安忍銘邪君諱東山字魯瞻郭姓
萊之掖縣人生於成化庚寅二月九日母贈孺人侯氏方
娠夢吞鶴卵已而誕君聰悟不凡四五歲讀書善屬對多
驚人語父贈御史靜齋翁釗司訓阜城君隨宦邸先少保
公見之異焉後以子妻之即子女弟也既靜齋教諭清河
捐館君年十一扶柩哀毀幾不生長游郡庠學業日充弘

治壬子舉于鄉丙辰登進士知浙之山陰縣以誠信臨下
事叢沓必書一日始而人竊訾其嚴數月羣心帖服矣未
幾遭侯孺人喪歛奠一於禮起復除濬縣政譽視山陰益
茂城濱衛河雨溢漂沒田廬君露禱祠神水退具以災告
命蠲其稅且給鄰帑賑之民困賴之以蘇部使者交薦
其為畿內良吏第一癸亥 召入內臺理刑明年授陝西
道監察御史首論英國公某者非將材侍郎許進可當
大任識者韙其言天象見復極陳敬天法祖親賢遠姦及
權倖交通法律數事言甚剴切觸時忌 詔奪俸三月掌
院安福張公嘆曰真御史也巡視東城太倉及清查御馬

監艸場宿蠹洗革甚多止德改元 恩例膺勅命封贈

其父母尋差頒賞于陝右三邊行五威寔實惠丁郊出按
宣大一鎮前巡者以直道得禍人皆為繼者危君至憲度
肅然不失體虜犯獨石宣兵畏縮乃趣其進而大同兵擣
角禦之虜遂遁追斬數級捷 聞賜金綺如是者五逆瑾
亂政邊儲歲一數實 勅君兼之有欲苛察迎合者君

曰吾知盡公以副 上命爾利害非所計也代還瑾以不
通賄御之時巨璫開三廠偵事勢焰薰灼其昆弟廝養
率冒名尺籍以徼功君在鎮紀驗一切裁抑之邪黨搆陷
逮君 詔獄被笞免官歸門謝客日惟閱農課子徜徉山水間

澹如也。郤大夫迎致弗往，有疑事，多就質之。壬申，起廢擢四川按察司僉事。鵠賊廖麻子喻，虺橫甚，巡撫者順其情處之。臨江市居巡川北道，此豈弭盜術邪？不得已防衛出境，後賊復叛。朝廷命左都御史彭公率邊兵討之。君上平寇八策，公曰：鵠賊非盡勦不可。君曰：渠魁當勦，而脅從者當撫之，仁義兼舉，斯王者之師乎。彭公乃檄君監諸軍師出。由德陽至劔州，累至克捷，賊潰。君料其勢必走潼州，即發兵起江賊，果至半渡，擊之，俘斬甚衆。經秋，林嘯聚千餘，君從便加兵，望風解散。次射洪，遇前賊親督行陳，斬右掖長不用命者，以徇諸君。股粟奮勇，縛其首蠻端，公轉

戰至牛山及三义溪連有俘斬賊亂徑走安岳彭公復檄
君兼巡四道君分路出兵鐵爐溝獲虜妻孥及其輜重賊
狼狽不支轉而奔北君乘勝長追備歷險阻甚至行滕鐵
澁與士卒同之賊計窮乞降地方以寧是役也凡三閱月
馳驅殆萬里十年之寇一旦平之功亦偉矣彭公見其籌
畫深加嘆賞然終以初議不合功歸總帥而君不與焉君
亦未嘗形於言蜀人繪圖賦詩以紀之丙子擢副使撫治
東達適燹夷普法惡煽亂君代川南道事會兵討之躬
冒瘴癘直抵葛魁諸寨擣其巢穴元惡授首其烏蒙部
諸寨亦隨宜撫輯之奏上加俸一級仍蒞東達東達地連

番夷民性頑曠君教之務農業興禮讓少有悖肆者繩之
以法曰汝輩獨不見喻廖夔夷事乎衆感勸漸變舊習戊
寅擢右叅政入賀萬壽

聖節中途疾作嘆曰吾昔

累蹈危險幾殆而竟以是疾吾盍休乎遂上疏致其事而
歸始君之力學博究經史及諸子百家言中罹坎坷肆為
歌詩樂府沉郁有則及退居山林乃耆遠遊參同契之說
晚年幅巾深衣幽尋遠眺未嘗一日去酒或謂有晉人風
致不知其托特此以寄興耳往與予及二三老訂忘形會
君志氣豪爽弗替一夕忽感微恙而終享年六十有一君
頽然備觀動止有矩度言論侃侃中於理孝友本之天性

蚤孤事侯孺人篤至有旨味必先以獻歲時祠堂具籩簋
從事姊適楊氏嫠居服食悉周之久益不懈訓從朴輩動
以前修為法曰立身無負所生以貽先世爰其庶乎至諸
女亦口授內則俾知大義平居喜恕不妄發人莫窺其際
每端坐澄慮豁然若有所得曰學以涵養本源也徒敝神
於支流抑末矣故君之履堅秉真夷險一致而不渝故素
者盖有以也夫少築精舍于東巖下因號石崖配毛氏封
孺人壺懿懋聞子二長郎從朴己丑進士醇雅遠器次從
楷府學生濟美可斯女四儒官玉洲都事李光祚國子生
王教張約其婚也次適光祚者先卒孫二祖杰祖熙孫女三

尚幼玉甫與居世契狀其行事核而指宏特舉君按邊被
禍之大節首書之得史氏提要之法矣頤予衰且疾不能
有所加也銘曰 維郭之先系自周始仲叔封魏後因為
氏殷轉曰郭代有高風齊最燕隗暨漢林宗世遠族散匪
諧奚述至有明初諱祥者出爰從濠泗籍我東萊六

弗顯遠於靜齋起家儒業地榮柱史迴生石崖人曰有
子一蜚冲霄鳴彼朝陽胡蹶之遇若履康莊再起西川巍
乎方岳躬殲鉅寇飽經盤錯維蜀既平維功既成人掩其
有我懷奚嬰歸來海隅反厥初服涉谷慕盤臨水慕涑
孰云神往八極遨遊芒芒大塊元化周流有美雙壁伯已

登第吾志欲為斯焉其繼辟彼瓜瓞益綿益蕃澤流靡究
混混其源維後之昌此固其理玄宅理銘垂于永祀



浙江圖書館

浙江圖書館



浙江圖書館

東川先生行狀

東川先生吉水鄉先生也先生居富溪東而行又甚高閭
士大夫間於是學者尊先生率稱東川先生先生姓羅氏
名僑字維升生天順壬午二十六日幼有奇名六歲偶文
句應声成十二通文詞是時父通判君為南京大學生先
生因學大學中閉戶誦習貌甚莊諸大學生見之呼為小
先生長為邑弟子員有文声是時弟子員拘制業咸有門
戶牽綴試目穷年不得休息而南昌張東白公元禎以道
術鳴先生徃從居之半載尽得其說以歸自是授生徒輒
以収放心為言於是行輩益推先生乙卯舉鄉試明年試

春官不第為南京大學生祭酒劉震聞其名特禮之己未
舉進士癸亥授廣東新會縣知縣新會廣東劇縣號難治
先生治尚風化謂學者溺章句无本實而專內業者輒目
為異端於古人甚悖於是表陳白沙公言辭行事令學者
誦法朔壁坐學宮講論不輟諸所行罷多放古事之善者
三年民安之己巳內召補大理評事是時閹人劉瑾擅
王命用濫刑先生自念刑官無狀庚午歲早上封事其
畧曰臣聞人道理則陰陽和今旦夕齋戒而雨澤尚滯臣
竊以為天心仁受未已也夫先王視朝遊觀咸有常度故
矣妃有雞鳴之警召奭陳卷阿之詩此敦穆穆之化也今

陛下日昃不朝戲狎群小殆非所以基大業矣宰相諫官者將以輔政通蔽者也今文法大深誅求大急盜賊白晝殺人流移載道元氣竭矣而宰執諫臣噤不為語安得不致壅蔽為大患哉是以黥劓之刑上於大夫竄戍之罪加之耆舊如劉大夏忠蓋置之行伍潘蕃謫遠幾無生還陛下置而不問是豈勸大臣之道歟先朝律例裁酌古今咸足以禁奸而懲罪今徃徃比附深巧隱中善人竊臣之所不忍也詩云殆天之未陰雨徹彼桑土綢繆牖戶今日防患如獲巢然防不密則巢傾天下固大噐也受惜預防可不如鳥乎當時是瑾肆害立威道路以目无敢言時政者

先生䟽上瑾意䟽語隱約咸有所指將處之極刑大學士
李東陽力解得免官歸其年秋瑾敗於是御史凌相上䟽
謂評事羅僑燭事幾之未露過氣燭於方張君子之所難
也宜大用而勸忠直明年復大理評事病作復告歸又明
年喪母与伯兄独居者三年己卯宸濠反都御史王守仁
起兵吉安討之聘先生居守吉水濠既擒王奏功䟽先生
名而前後臺諫亦交薦卒己

今上即位有召旨先生感

激就道數日擢至陞台州府知府先生自辛未病告家居
十餘年蔬食讀書於公府无所干謁及治台摧奸惠良興
學礼士愷悌宜民、訟歐、語利害多解去歲特循行阡

陌率冠婚喪祭禮教民布衣張尺賢而貧延之上坐訪民間
何所疾苦尺具以所聞對乃為尺置童僕給侍於是台人
因多感悟戍衛食倚各郡餉前守漁其中即溢取畜出之
入 覲治裝咸苦民先生首除羨餉而 覲行自給无他
与是吏部上天下守令殿最以先生治行第一賜襲衣牢
醴旌異之癸未二月巡撫延綏都御史姚鎮奏云人君之
道莫大於納諫人臣之道莫大於進諫人固難也而勢尤
難者則獨處雷霆之下与首擊豺狼之橫者耳臣聞

武皇臨御八黨擅權皆逆臣劉瑾之魁也故尚書韓文
伏闕倡言旋遭斥逐其後敢有嬰其禍鋒者乎而給事中

劉莊復言之已而評事羅僑繼言之已而不復聞是所謂竟
獨處雷霆之下与首擊豺狼之橫者也今遇聖明首宜獎
擢以風天下顧莊知長沙僑知台州皆常調也夫以懷忠
尽節之士而待以常調人將何勸么伏悲之四月擢廣東
布政使左叅政台人呼號曰之不得強脫靴去而郿縣咸
為立公思碑甲申先生至廣東分守嶺西道是時西山諸
賊猖獗先生設擒捕法竟多斂避八月以故事當引年即
上疏乞骸棄官歸總制都御史張嶺巡按御史熊蘭奏
畧曰左叅政羅僑學靡詞章志趨道義劾摧奸而直氣
不挫遭擯棄而貞節益堅誠未可遽聽其去也先生乃復

上疏詞旨哀懇吏部移檄以先生忠貞在朝廷循良在郡
省且引年乞休於故事未協使者促行甚急先生不得已
復至韶州固以疾辭於是總制都御史盛應期疏其事竟
得請云先生既歸杜門謝客日對書史著潛心錄探索理
道謂孳湏寡欲則心中无事平生自處甚儉食無蕪味家
无竒玩賓客至具常食无所計量伯兄終身怡々歲獲
贏分給諸族時聚謁誨以孝友故終先生之世家人鮮有
違教令者先生早年以學自命故諸制行必謹規矩為新
會厓山在治境感宋死事諸臣歲泛海祠焉在台建忠節
祠祠方孝孺置祀田若干壬午東廓鄒子講學青原山

中時與往來議論而洪先居喪不廢業先生以為不應古
禮責以書曰講學之功尊得性之資未為无補也何独嫌
於表次乎愚以為取益於友不若取益於心取益於天子
何不自信而過遜哉恐索子者當於牝牡驪黃外矣是
時先生方病痰書皆口授而據禮嚴振无少讓九月五日對
客理前語端坐卒矣嗚呼儒者之學至近世門戶各異
先生独遠探玄覽古昔是尚漁宗旨異同砥礪踈密未
敢溢詞然自壯至老凝然樹奇履坦不雜浮鄙其可不謂
志士哉吉水民俗朴而士負氣故多偉人自先生所及見
張黻以諫留大臣謫死劉觀好學棄官貧居表道守法

暴死嶺南劉桓令上邑家無帛錢先生行事視此四人者
頗相類豈亦地使然哉語曰魯无君子者斯焉取斯先人
與先生同舉進士皆以行誼相高洪先以故得幸侍側時
受成訓悉聞諸懿恐盛美不傳後世何述於是攷先生操
向列其行事俾風流遠遺尚有興者先生子二孫男一孫
女四長子卿谷坪李宜人出次子宰側室濟寧于氏出卿
子恣俱縣諸生先生上世曰必先宋李田廬陵大安家湖
南再徙吉水富溪曾祖支順富而好士祖声振精易學員
時各累聘不就父穎世其學後為太平府通判有惠政壬
午先生以恩澤請於是勅贈穎承德郎職如故妣袁氏配

李氏贈安人而先生墓在所居南半里

浙江圖書館



嘉議大夫河南布政司右叅政吳公墓誌銘

文徵明



公姓吳氏諱愈字惟謙晚號遜翁世家蕪之崑山曾大父
子才大父公式皇贈承德郎刑部主事父凱字相虞仕
終禮部主客司主事脩正疆執事母篤孝年四十棄官歸
養以高年令終鄉人私謚貞孝先生母安人陳氏公生正
統癸亥八月一日成化戊子以縣學生舉應天鄉試乙未
舉禮部會試廷試賜進士出身戊戌授南京刑部廣東
司主事己亥丁母憂甲辰復除本司主事歷員外郎郎中
弘治庚戌陞四川敘州府知府癸亥進河南右叅政明年

甲子致仕嘉靖元年壬午以 登極恩進階嘉議大夫五
年丙戌五月十又九日終于家年八十有四公自少聞朗
書過目不忘嘗詣外舅夏公仲昭閱壁間文累教百言閱
已取筆書之不遺一字資既穎異又敏學彊解不遺餘力
既連舉得雋益精進不懈初官法比郎思明法以達于政
每退自公輒取獄詞翻閱探竟凡事始章程傳爰論報悉
究而通之事至迎解不煩檢會所部兼理畿輔事无苛劇
公省決敏利庭無留獄析律詳明所當必允苟得其情雖
貴勢不避時留守中官驕不奉法會有事當按公持之急
中官使人宣言欺公且懼以禍公鼎對閒整語直而遜卒

竟其獄不少骫骳然不為深文內庫遺火事連中司坐死
者數人公具獄以比請尚書言情罪既得奚以比為公曰
法如是不可踰也尚書執不從獄上何文肅公當讞閱其
牘稱善曰此吳郎中筆也但其所坐非正律宜以比言卒
改用比律奏之尚書乃悔不用公言由是益任公每公當
遷輒奏留之凡一再進官皆不離故署會詔大臣舉屬
吏尚書鄭時侍郎徐懷聯章薦公堪長藩臬奏上而叙州
之命以下叙去京師萬里俗獷喜訐吏多並緣為姦公始
至判牘日以百數吏改矯列數事嘗之公且判且閱徐摘
所矯數事訊吏吏即叩頭俱伏公既精敏善發摘而濟以

嚴重有犯即繩以法吏畏民懷訟用衰鮮尤慎刑獄每行
縣錄囚必有平反慶符盜正晝劫縣誣執二十七人皆抵
死公審鞫左驗惟二人真盜乃悉縱遣二十五人其後果
獲餘盜貴州都勻用兵敎當轉餉而道路險遠公調遣節
適民不勞而事集出諸群

上有

詔錫楮繼文幣旌之

所屬長寧筠珙夷獠雜居剽悍易動公撫以恩信示之禮
法久皆懷附然無故不輕調集會撫臣移文發其渠率至
省閱習公執不遣曰太羊之性未易擾伏一奔遂不可
安輯撫臣不以為然必欲致之已而椎剽鹵掠旋不可制
公手書片楮諭之即復弭帖蓋公推誠待物素為夷獠信

向如此土官安鰲以馬湖叛有詔掩捕而叙實寔北壤
藩臬重臣咸會於敘公言鰲輕剽無遠謀然器甲精利兵
亦矯捷未易攻取不若重圍困之彼中無水不一月可坐
而降也議未決而鰲棄城走將糾諸夷為亂衆相顧不知
所為公徐曰鰲在吾彀中矣問故曰彼以郡守將兵接戰
勝負未可知既離巢穴一窮虜耳所轄諸酋長皆其深讐
彼且無以自容又何能為因遣人襲而執之曾不血刃而
元兇授首及改設流官其醜類不服復嘯境上劫郡印為
亂衆益恠擾公親叩其壘好言論之曰等若情有欲言言
諸朝當有處分何以印為印出朝廷失一印復制一印於

我何損若特去特一敗銅耳吾憐若以無用之物自陷罪
辟故為若言若無以印為也衆即委印解散自首事至救
寧公皆在行間謀畫多自公出此奏報而賞不及公衆為
不平公曰敎與虜接師或不競敎寔先受禍此守臣責也
今得無恙幸笑敢凱賞乎在郡九年劬農振業興學教民
民靖化洽歲亦比登乃平繇更賦勾考邊儲之侵於民者
得四十餘萬輸將轉調亦數十萬廩庾既充以時賑發流
庸未歸戶口增羨郡以大治在河南兼理屯田時田多為藩
府乾沒及勢家漁取或假中官庇覆厭抑詆譖莫能致詰
公訾省鈎校多所緒正在省一年展采錯事方將有為而

臺評出笑會蜀士有不悅公者復從中醞釀之而公亦已
倦遊遂致仕去公識慮精審舉動詳緩每計事必要其終
斟酌分割不少滲漏一時雖若迂遠而積久考成徃徃有
餘沿牒徃來非公事不輒乘官舫雖遠不給過所官中饋
遺一不受亦不以官物遺人嘗自言在官經費一錢以上
皆注籍令皆可覆其所為必視法所在故歷官中外未嘗
一掛吏議其待屬吏特嚴雖所喜不少假色詞所不喜者
亦不輒肆詆挫不立科條不收醵譽而質行履方徃徃出
名上故所在政事卓卓而人鮮復稱之尤不欲有所附離
初登第觀政兵部部僚與當路交比者雅喜公故為引重

欵援致要地公謝曰某忝列進士入官自有本末因緣進
取非所志也其人媿謝後當路敗所引咸坐廢而公無與
時已躋公卓識其後益勵不變浮沉常調者垂三十年晚
始邂逅一奮而竟以讒罷嗚呼此足以占公之所立笑家
居尤事檢持出入起居咸有常度接人和而有辨故雖燕
笑融洽而人莫敢慢易人有過不面加諫讓惟對之不言
而已其待子弟亦然然人每以是候公顏色所加甚於質
也故諸子若孫咸孳孳自將無少縱弛閨庭雍睦訾毀
不聞邑中稱詩禮家必首及之雅喜賓客讌設精鑿禮文
祥雅周旋樽俎間終日忘倦晚歲聰明不衰音吐洪暢理

言遺事記憶歷歷每對客舉似不必深竟顛末風流雅尚
奕奕照人蓋以高年令德為鄉邑之望者二十有二年嗚
呼今則已矣有如公者可復得邪公娶夏氏太常卿仲昭
女封安人有賢行先公三十年卒無子側室姚氏生子四
人長東浦江縣丞次南國子生為仲兄靜菴後次西次守
中國子生東西皆先卒夏安人生女三人長適王銀以子
貴贈翰林院編修次陸仲戊辰進士死逆瑾時追大理寺
評事次文徵明翰林院待詔側室趙氏生女二人適陸潔
朱希韓餘一人尚幼孫男四人詩訪許詠詩國子生訪縣
學生許天女六人曾孫男二人女三人塋以卒之又明年

戊子十二月十又七日墓在邑東積善鄉與仁里夏安人
祔銘 顯允吳公既貞既碩有言庚康亦順其德侃侃貞
孝為時令臣弗大厥施發于嗣人憲憲邦刑翼翼盛業豈
曰世燦光于有烈維烈如何肅肅在公入守郎曹出疇民
庸惟此叙服獠夷易虺有綏弗護式柔永懷豈民則懷亦
貞厥履穆穆改改納于仁軌道隆罔嚇功成不言 天子
有詔往奠中原有攸王臣既貞亦蹇時弗我違身則既倦
菟裘既營式適其歸公歸維何鄉人有依顯允吳公維民
之則出建邦猷處範鄉國國則殄瘁斯人云亡後千萬年
以允有光人亦有言維德則久我作銘詞尚諡厥後

陝西等處承宣布政使司右叅政樂平李公墓誌銘

岱

和順王雲鳳撰

正德庚午冬謝病歸山過樂平公來會邨告余以劾蔣琮
事曰琮狼黠人也初守備南京欲陷縉紳不側之禍以立
威覷縷瑣細誣訐臺諫數十人謫以去勢益張又連訐諸
司官悅首就逮寃鬱不伸念倖蒙恩為言官不可坐視然
人方縮悶莫敢誦言攻之異時一二雄俊敢言之士皆時
不可為解一日余騎馬出門默墨獨行勿遇郭史者告之
故郭欣然同議乃歸疏琮大罪數事合同官上之琮遂下
獄以死公為言官所論列關於朝廷政治之大者雖多惟

蔣琮則當其寵幸初隆之日尤為人所難余別去踰年而
公病又數月而訃至其子天衢以教諭沈盤狀請銘乃遂
其事公之告我有以也夫按狀樂平之李先世居平定五
代祖諱唐自平定未徙生五子次子諱從善公之高祖也
曾祖諱李忠考諱寧皆稱長者而祖又為鄉人所信服年
九十以壽遇詔冠帶考以公貴并封南京刑科給事中進
封南京光祿寺少卿妣劉氏封孺人進封宜人公諱岱字
宗岳生而穎異長能文魁其儕輩家貧當躬杵臼以養親
夜雨敗隣人之垣若有藏物家人欲取為公聞而至止翌
日其家始覓得錢數斛邑人有受金縱盜而情可原者縣

令與其人有仇歆致之死翟清者被怨家誣告魘魅死罪
公皆營辯得出登成化丁未進士弘治二年拜南京兵科
給事中有直身上檢身求言敬大臣謹天諸事多見采納
尚書鄭時不職內官張廷縱恣殺人都御史秦公紘為安
後侯柳景誣奏公倡諸臺諫言之秦竟得白時罷去廷寘
于法又言前威寧遠伯王越不當蚤緣起用公內烟弗爆
謙抑簡靜為言官數年不形矜色至有檢覈勘問之事人
必稱平十年遷南京光祿少卿每歲上供天鵝鹿腊皆以
樊籠生致于洞庭嶺海五千里之外民病之既腊或不
堪尤庖公言於太宰倪公因災異陳言及之止徵其直上

供法醞每歲酒人綱送用舟八十餘艘役夫為姦且不時
至公為之藉使有統紀弊遂絕又為藉以稽錢物出納增
糧以蘓庖人之困而鏡考餘子前為光祿者率以遐逸自
諉公每日事事諸瘕皆與見者改觀正德三年考績至京
時劉瑾用事大肆饗靈公卿而下鮮不以賄通多至千金
少亦數百金公無所餽或曰君禍至矣公曰命也適天衢
為刑部郎中以無罪被逮又不以餽或曰君禍大笑公曰
命也天衢竟出為陳州守居無何吏部薦公為太僕少卿
謹識其名乃令致仕公不戚而喜於是士大夫嘆公有守
云公平交結瑾誅當內遷乃外補陝西布政司右叅政未

行丁父憂七年二月四日病卒年六十有八配趙氏封宜人子男三天衢丙辰進士河南按察僉事天銜天衡女二生員聶鎬喬宗伯侄詩其婿也孫男一及辰女二幼十二月六日葬祖塋獅子山之原公法宜銘銘曰維德蘊才才或鮮德悃悞君子確然內植優以施之人莫我惑摧姦如山極善如溺乃掌王蓋惟民之惻起顏而趨撫困以息忤時歸耒厥聲有赫身在田園憂在邦國知歆考公世視此銘刻

浙

三
五
錢



浙 江 圖 書 館

正
德
十
年
庚

明亞中大夫山西布政使司右叅政郭公墓碑

正德十年卒

公自平陽知府擢山西右叅政分蒞冀北督邊儲未久病疾乃上疏言陛下過聽不以臣桂踈淺使待罪藩省居邊亭給饋餉職專位重損首無以報通者臣桂不幸有大馬病旦暮且死願從陛下乞骸骨歸故里即死無所恨惟陛下留意哀憐之幸垂察焉臣桂頓首頓首死罪既得報一日乃遂不起蓋正德丙子七月九日云而丁丑二月某日葬鳳栖原先塋予獲從其叔父舉子鳴和游習聞其世

事勒諸石樹之墓道令後世知有賢大夫之事其

辭曰叅政郭公者諱桂字時芳咸寧縣鮑陂里人也蓋其

上世有為御史者冠鐵冠人稱鐵冠郭家家藏仕宦者畫
像而傳以為元時人也然不可考矣其五世祖曰道原明
洪武初舉人材為河間府經歷而生子恒恒生琮琮生鏢
鏢配楊氏生叅政公公二十六而精通毛詩舉鄉試三十
三而舉進士為知縣安丘安丘民王愷者富而橫令至則
啖之以利既乃鉗制不得動乃長揖不拜令心內忿然無
可柰何至是愷使人逆公以利啖之公拒不可怒斥之去
至縣而愷自來謁乃發其事鞭笞之愷懼與其兄弟謀害
公陰中以禍公以罪擒殺愷愷兄弟徙為邊氓未久縣翁
有訟其子盜金者且罵母公知其為後母也而謂翁曰亟

婦而發媪衣笥中可得金果得之于是翁大感悟知其為媪為之也乃復愛其子也公嘗趨郡謁郡大夫而縣中因徒乘隙反獄走匿不可得攝縣者懼追告之途公曰當在某地古墻坎窞中果然然其他政事明斷多此類也此宜起為御史會讒不果稍遷湖州府通判督糧儲湖州府通判督糧儲者未有能自拔超遷法者蓋多以賄敗公獨以廉而又綜理周密能祛其宿弊人莫敢犯之儲運輒先期完稱為能而遷為秦州知州州有三虎一日鄧仁一日祁清一日蘓容公至而鄧仁祁清以姦事發覺死而蘓容獨存有以為言者公曰姑待待其自至乃一日姦事發覺至

州門曰死矣公曰死即瘞之三日出屍

乃死然其初

實詐不死也其待惡戾民如此可畏也而于好民則子孫
視之惟恐其或傷之于是州中遠近歌頌相戒不敢為惡
恐犯教如三虎死居無何轉鎮江府同知同知位尊而無
權有分職職清戎蓋千孔百瘡其他政令可否惟郡守時
時視郡守顏色喜怒不敢多一語公則不然視理不視郡
守守亦察知其為人善待無敢易之其始人見其理戎務
也老吏猾胥歛手縮項弊端塞絕也然不知其他蓋嘗攝
郡事理詞訟決疑獄而人乃更屈服翕然稱之惟恐不為
郡守其後遷為郡守乃不于鎮江于開封焉于是鎮江之

人無不咨嗟歎息也惜其去輒留然不可得也至開封旬
日會母喪以歸歸未久而父亦卒喪畢起復為平陽平陽
山西大郡轄州縣多而是時海內多事盜賊起百姓凋敝
又多藩邸下人怙勢侮法無敢誰何者公至而盜賊息州
縣平藩邸各輯其下百姓安堵久之而衣食足歌頌興焉
公曰民可使也于是新堯廟堯廟成增修舜禹廟亦成戶
部尚書韓先生者洞洪人也年八十餘家居賓客非其人
不與見也乃安車入平陽謁謝而曰老人無所求強為百
姓一行未久擢叅政去不幸疾病乃五十九歲卒其在安
丘也三載考其績稱無過及當道者論薦例當封于是天

子下詔即封其父錄文林郎安丘縣知縣封其母楊氏配
于氏俱為孺人于孺人與側室孫氏者具在生男子濂治
沅汾而濂為太學生世其業餘與女子一人俱幼其銘曰
泰山之東有邑其墉牛刀發剗孰過爾鋒大江以南亦蒞
其北孰踰爾軌以遺爾德稽古平陽國有堯宇蟋蟀載詠
維爾是怙皇念爾勲陟于晉藩不吊昊天中道爾顛生稱
鳳岡塋以鳳原吁嗟郭公爾亦孔安

明故中大夫山布政司右參政張君墓碑銘

敏

撰

正德十三年戊寅四月十一日山西布政司右參政致仕
張君時勉卒於嘉興君弟主事某率君嗣子淮來請予文
刻之墓道予承乏館閣時習聞君名有以身殉國之義法
宜銘乃不忍辭初正德庚午川蜀盜起鄔藍廖喻諸賊首
勢猖獗甚自夔達蔓延保順諸郡營連十餘里衆號數萬
兩川震動君時為馬湖知府總制洪公鐘聞君雄武有謀
略特屬任之君請以邏曰兵自當一面曰賊雖凶獷然皆
烏合之衆易與耳進過於通君門鎮君麾衆大呼直前無

溪水盡

不一當百賊奔追斬幾盡赤自是賊氣沮喪所向有功鎮
巡倚以為重巡撫都御史林公俊上其績馱既就擒其黨
廖陳輩復糾眾為亂君白洪公謂渠魁已伏誅餘出脅從
法宜撫定若一槩兵之恐玉石俱焚非天兵弔伐意然眾
莫敢任事君已為兵備矣乃獨請往遂單騎入賊營賊露
刃以俟君曰吾為活汝來寧畏死耶因宣布德意曉以禍
福眾感激泣下陳賊首詣軍門聽撫散其黨二萬餘人廖
憤陳先受招乘夜剗營將并害君君笑曰吾不怖死但恐
大兵其全汝輩無噍類耳賊為之吐舌時淮自浙來省得
報冒鋒刃入賊營願與君同死君以宗祧事重趣之出貽

書兩司宜急進兵攻賊毋以予故遺地方患又與其家人

訣曰以死勤事予之分也汝第治裝歸賊尋悟送君出營

嗟乎川蜀藍廖之禍裂笑小官末職死賊手手者弗論方憲

官之遭荼毒者亦不啻數人君提兵數年崎嶇危難至犯

賊鋒蹈必死之地而卒保其身以就丕績雖勇略過人微

君忠憤誠切有以動神明而感盜賊亦惡能爾當是時鎮

巡交薦至欲以風憲重職屬之事雖未果而聖首慰諭璽

書褒勵白金綵繒之賜相望亦可謂受知明時矣君既出

營偶墜產傷足乞致仕不許復起治兵事既而都御史彭

公來代洪總制尤知君因問平賊計策君謂賊既撫而叛

非

實有降意特借是以老我師宜及公初至亟集兵勦之可
絕後患彭公竟用其言平賊君浙江嘉興海鹽人也諱敏
字時勉世業儒洪武間曾祖景福檢校河南開封府從征
雲成大理因家焉祖禧雅知兵法總鎮黔國公奏授國子
博士俾教武臣子弟封奉政大夫南京戶部郎中祖母金
氏封太宜人父正舉雲南鄉試第一官至建寧知府致政
歸仍定籍嘉興母呂氏封宜人君少負竒有才名鄉舉亦
自雲南會試數不偶弘治己未始拜蘭州知州蘭州密
邇虜巢虜時剽掠州民苦之君嚴譏察奸細至趣擒獲斬
之自是虜不敢輕入州氓多家村落城中惟藩邸軍衛人

素侵暴百姓輕州官君乃一切裁以法民始安生屬河漲
壞桴橋民以皮囊渡多溺死君度材鳩工親臨督役數日
橋成民不病涉善聽斷摘人隱伏多曲中遇事敢為嘗勘
牧地之久為豪右所據者盡追復之還官遷西安府同知
專督儲餉期歲完逋負五十萬而民不怨擢馬湖知府再
擢四川按察副使奉勅整飭綿利知州兵備盜平進山西
布政司右叅政遂致仕越四年卒年僅五十七配李氏无
出以族兄瑛仲子繼後即佳也以剿賊功授嘉興千戶所
鎮撫女三婦國子生屠應圻庠生朱賢沈瑄皆名族君內
行脩整執親喪禮而哀廬於墓者三閱歲鄉人稱之庶弟

轍失怙時尚幼此長盡擇美田宅與之曰此吾父所鍾愛
不忍薄也則其居家之行亦有過人者矣銘曰

嗚呼民蹈於死孰使之生身蹈於危孰使之寧卓哉張君
惟忠義是憑格于幽明績用以成蟻聚絳屯蜀狂弄兵君
曰毋恐指顧掃平殘寇扇亂迷執弗醒君曰勿誅此亦天
民仁以為甲義以為旌視賊如傷弗剪弗蕩有變倏起豈
謀弗令不有彼逆曷張我貞妖氛載靖豸繡益明 天恩
屢錫榮莫與京匪君忠義我曷以銘石叻山頽惟君績弗

傾

明故山西布政司右叅政華君暨配錢恭人合葬銘

卽寶

正德己卯六月某日山西布政司右叅政華君以疾卒於
官庠也越一月其季子鑿奔走數千里奉其喪歸以十一
月某日至殯于堂越明年庚辰十月二十八日其配錢恭
人亦以疾卒歿也又明年辛巳某月某日其子鑿等奉二
柩合葬于秦塘涇之新阡而請銘于君昔同鼓篋之友冉
涇卽某某乃按其姻友都運張先生狀叙而銘之其叙曰
君諱津字濟之別號審齋姓華氏世為無錫人其先在晉
有孝子寶在宋有榮者榮以仕徙居于汴至原泉避亂復來

居隆亭族始蕃衍又五世至友直元常州路總管總管子
琇嘗以處士舉於集賢院號曰清逸其子希賢以文行為
鄉望所著有東湖集君五世祖也傳汝立諒至君祖俊字
景榮出贅西山錢氏因家秦塘涇之上辭分業而自立遂
成厥家有子三人其長為君之父瑄字伯和配蔡氏生君
兄弟五人君行居三敏而知學弱冠游邑庠二十六領成
化癸卯鄉薦越三年丁未登進士第授湖廣松滋縣知縣
操勵自躬庶致斬斬時有奸人挾王府勢強取於民君
執而法之江溢壞民廬君為之防民賴以安滿三年撫按
旌異政遂以風憲召聞母疾取道歸省比至陞刑部主事

以松滋之旌 封伯和文林郎松滋縣知縣母蔡為孺人
君在刑部遇疑獄反覆參鞠盡求生之道決囚淮揚郡諸
平反為多屬有疾請告歸遭文林公喪乳乳在次疾不越戶
限起復改戶部主事出納惟謹嘗監通州倉有怙中監勢
請事者君拒之固中監銜之尚書顧公虞其中傷君也亟
調監七馬房倉其嚴猶通州三年署員外郎奉 勅勘田
湖廣常德時究瑾扇虐既行而有後命遣人追與之牒至
則君由水道還矣其人既還報而君始至衆為君危之瑾
見於左順門顧而謂曰華先生汝未何遲也蓋亟往事事
乎竟無他言未幾署郎中二年陞湖廣辰州知州遭蔡孺

人喪起復補直隸廣平府時當兵荒君畢精經畫凡無益
之費不急之務悉罷之又請蠲常賦外民不能共者數事
惟學校所湏不以乏省太僕丞有欲收養馬民免地稅錢
十之五者君曰民累於馬甚矣以若所免猶不紓困如征
其半民何以堪遂以其事白巡撫都御史轉聞于朝悉
復其故屬邑邯鄲城每山水秋至輒為之壞民病脩築君
曰山水挾西河橫流舍河而他圖雖勞無庸乃改河上流
北注之漳水勢既分城乃無墊事見李文正公所為記貴
戚并民田於清河征歛太橫民訴於朝事下之日君削
其數什九民歸君德議立生祠君止之三年以異政被

旌誥進階中憲大夫 贈封其父母妻皆如典尋陞令官
分守河東道搜剔利弊罷行惟免發私賄以正官邪禁戢
豪強視廣平尤力居二年上疏乞休不許會 車駕西幸
凡境內供億之事夙夜調度者三月繼聞 再幸之報巡
撫都御史偕君至代殫力繕備又越二月疾作返卧司解
月餘遂卒年六十一君子謂君簡而惠共而介有君子之
道配錢恭人男四人長即鑿次鑿次鑿次即鑿次鉅出繼
錢氏姑女二人長適長洲王典次適鄒曾孫男九人女八
人又叙曰恭人諱淑姓錢氏吳越武肅王鏐之後父玘母
胡氏溫雅淑慎出於天性年若干歸君君歷仕中外恭人

什五家居躬績以率其衆凡再當大喪四婚二嫁力治而
襄君以是無內顧卒年五十九君子謂恭人孝慈儉勤於
君無違德其銘曰華著于錫世有冠纓甲科之盛莫如我
明君起丁未歷官凡六總總刑章瑣瑣金穀惟慎惟清
厥聞聞孔淑孰不佐藩君獨盡瘁令乎守乎前庸既最子往
問疾而以喪未恭人繼歿無乃病哀伉儷皆藏是曰禮葬
彼屹者碑千載之望

明故大中大夫四川布政司右叅政吳君神道碑銘

周用

嘉靖三年令南京刑部尚書致仕吳公之子巖以四川布政司叅政奉表入賀 萬壽節及安慶遇疾乃命趨京口

進舟而南未至家五十里以卒寔是年五月九日年四十

九明年三月十一日其子邦模以尚書公命葬于縣之某

鄉某字圖復伐石樹之墓左其友人周用則序而為之銘

君字瞻之其先有諱十一者自淮揚間遷居於吳遂世為

吳江人十一而下五世為贈大中大夫太僕寺卿諱伯昂

大中生封承德郎南京刑部主事諱璋有孝行贈官如其

父承德生尚書君即尚書之仲子也母王氏贈夫人繼母
夏氏贈淑人丘氏今封夫人君起家縣學生正德二年中
應天府鄉試明年第進士拜行人 楚王薨禮部舉君治
其喪祇肅將事楚人以為能重其國六年以選為工科給
事中七年遼東夷人走 闕下懇所在殺其使來告邊事
者 詔君覈其事君馳至遼東廉得其實曰是邊吏利單
弱冀以竊殺為首功者今茲法不信其將不免啟邊隙遂
獄抵以罪諸夷人頓首以朝廷不外遠人願歲脩朝貢於
我不絕九年正月 乾清宮災詔求直言君上疏乞 視
朝講學建儲斥養子出番僧遣兵罷中市凡數十事言甚

剴切十三年部使者持牒四出督民逋或因以為功遂并
與所嘗蠲除一切取盈煩苛無藝民不堪命君奏乞徵還
又乞遣大臣治東南水利宜墾白茆故道引太湖之水而
注之海 天子每從其言十六年今 天子即位君由工
科都給事中拜四川之命專領糧儲既至則問歲所出入
躬蚤夜治文書盡得其調度與諸守令約不得以贏耗病
民時時出行部徧 下邑無不有君之迹居一年姦利衰
止公私以饒君娶徐氏先卒繼娶沈氏俱封孺人子男三
長即邦模治舉業次邦楷邦材尚幼女二長適縣學生史
璧次許龐杰始君生三歲而失恃於王夫人稍長知哀痛

感激服尚書之教唯謹尚書久仕於南方君從其兄山能以
恭順見親愛家庭唯諾義兼師友久之志益堅業益脩
考行觀藝恒褻然居人先由是入朝為爭臣低昂公議
出佐方伯收其西人莫不卓有所樹立蓋其得於父兄者
為多抑君能用其厚於人倫其所獲宜如是君之不幸也
復以共天子之事來歸於數千里之外尚書率君之弟
若子視君闔棺會君之兄自陝西赴淞江叅政哭君於殯
俟君掩壙而後去嗚呼是豈皆遭其適哉於是益知君之
平生於君臣父子兄弟之相與蓋有所不可誣者已嗚呼
人亦孰不欲為善而君之食其報報其近如此是重可哀也

銘曰 淮海之邦伊濬其源暨來于吳其支寔蕃五世以
還先有孝德載厚其施寒泉弗食至于大夫克受丕祉乃
父乃兄爰世其美顧瞻四國 明命是將厥績告成置諸
帝旁我謀我猷是用風議濟於多難務大捐捐細野有虎
兕拆其齒角三江既東孰為之壑 帝眷西顧于昔之蜀
俾予近臣殖爾百穀維梁之山有岷有峨德不在茲農飽
而歌君朝 京師君胡東歸君歸不來蜀人孔悲功不以
時志不以年孰使則然人耶其天維吳之良維民之望墓
門有碑以永不忘

物致疑



浙江圖書館

中大夫雲南等處承宣布政使司左叅政凌谿朱公墓誌銘

應登

北郡李夢陽撰

嘉靖五年十二月乙丑中大夫雲南左叅政凌谿先生
卒于家越明年十二月庚申葬郭東三里官庄原先是訃
至大梁其友人夢陽既為位哭將絮酒束芻使使往奠之
會其弟應辰以書狀來徵銘曰先生天下士也先兄固雅
善公敢以銘請而厥子藩致懇辭更苦讀之令人淚簌簌
下曰凌谿以文崇其身所謂古人皆欲殺之者乃天亦
忌之使弗延邪夫人者顧子誅之備矣乃其心康之文足
白之矣而予復奚言者志曰凌谿先生姓朱氏名應登

字升之揚之寶應人也生而帶竒童時即解聲律諳詞章
十五盡通經史百家言其父江陵公者異之然懼其踰也
約之古凌谿悟乃著申臆賦以見志而力殫于淵學於是
飲醇探齋程猷經用噴英擣華樹聲藝林矣年二十舉進
士時顧華玉璘劉元瑞麟徐昌毅禎卿號江東三才凌谿
乃與並奮競騁吳楚之間歛為俊國篤古之士爭慕響臻
樂與之交而執政者顧不之喜惡抑之北人攢耻之黼黻
以經學自文曰後生不務實即時到李杜亦酒徒耳而柄
文者承弊襲常方工雕浮靡麗之詞取媚時眼見凌谿等
右文詞愈惡抑之曰是賣平天冠者於是凡號稱文學士

率不獲列于清街乃凌谿則拜南京戶部主事陰欲困之
凌谿劄劄斷錯乃顧亨于官而其學愈淵居無何陞延平
知府意州郡吏必黜乃凌谿為之愈益亨乃於是陞陝西
按察副使提學凌谿闢正學院群秦士高等其中置官設
徒豐餼嚴約談經講道至者且數千指風教大行文自韓
歐來學者無所師承迷昧顯則我明既興隆本雖切然要
奧未聞也及凌谿等出創觀駭疑大不容於人人各以所
不勝相壓而凌谿性挺直不解假詞色於人更哆憎口恨
不即穿之幸例調荒裔往禦魑魅尋陞叅政卒罷去凌谿
歸潛伏草莽中溫繹前業期十年盡償所願而今止矣噫

嗟嗟悲呼人忌之邪夫蛾眉胎禍才美殃毀順往逆來孰
非爾者然英人志士每甘心窮約而不悔者徒以人者難
必而天者足恃也十年之內徐何載淪凌谿晉歿天實忌
之矣何尤哉噫嗟嗟悲呼悲乎凌谿生成化十三年正月
己未得年五十鑿旨曰先富後貧病從内生言淺挾之易
析也凌谿廟落易直憎口日哆而聽之如蒼蠅過耳斯其
量可與億億心者道哉退研精肫推訂律歷運所讐史
質經底詮名實流覽今古橫睨宇宙視軒駟宜芻狗耳大
命中奪齋志長畢非天忌之而誰忌邪卒之日適邑官來
謁揖讓而氣絕斯病内生之否邪噫嗟嗟悲乎悲乎凌谿

他所竒節隱行與凡歷履宦業忠孝友義言動細小莫之
具述第述其生死大槩閔運數者如此詩文則自有集行
于世江隆公諱訥封南京戶部主事配范氏封安人江陵
父瓘以處士州郡徵之不應嘗與修英廟實錄處士父宗
泰宗泰父彥明往會凌谿面容其家世趙宋間名之修者
居于吳為學官宋季北徒徐名寶臣者元初為將軍元季
徒實應我朝名罪者通判擢州後謫戍為京衛兵然莫詳
其系次凌谿娶于陶亦封安人生子一曰藩孫子女各一
藩篤古世其家學朱氏弗衰矣銘曰却有洋湖有時桑不
崩者人於惟其文凌谿子墳



浙江圖書館

陝西布政司左叅政陸公墓表

溥

邵銳撰

予同年友錢塘平野陸公以江西左叅議擢陝西左叅政
行至靈寶而卒為嘉靖戊子五月也年才四十有五時予
方驅馳荆落訃聞既哭之矣浙大叅天水胡公纘宗銘其
墓文傳至洛中予讀之又哭蓋傷平野之才施不竟而徒
以空言托諸其友也平野為人沖淡雅素退然書生也至
論大事決大疑慷慨激烈屹如泰山喬嶽使天假之年其
豐功偉績當與古大臣齊驅並駕而僅止此悲夫歲甲午
予以僕臣歸農乃平野墓木已拱宿草斯零矣悲夫悲夫

雖然當毅皇帝時寘鑄謀不軌逆瑾內應齊魯趙魏賊從

魯

中起天下蓋岌岌岌公時筮仕職方相大司馬運籌決策動

中機宜大司馬不能一時舍公群官竟以次授首易危為

安公蓋養之素矣豈尋常徵幸機會者耶既而大駕將南

征公與同省諸郎伏闕諫止途杖幾斃予家居得邸報為

歎歎久之今想像其奇謀義意猶恍然在予目也公可謂

不死矣予又何悲公諱溥字元博別號平野丁卯舉子鄉

于

明年戊辰進士授兵部職方司主事壬申考績封母胡妻


吳皆安人乙亥丁內艱戊寅起復補武選司員外郎己卯

進武庫司郎中尋改武選辛巳考績封父清河令如其官

贈母封妻皆宜人出為江西左叅議今上改元詔獎先朝
諍臣加俸一級甲申例賜封君服如子丁亥假事歸省戊
子改官陝西二子相槐以予綴公未行乞表其阡嗟乎公
世系里居與馭歷政績之顯著大叅公志之詳矣予可以
無及特表其大都足信於後世者如此夫士居平時放言
高論奮迅激昂古今不少讓假令與公較公似不及至臨
事變若彼者則已厭畏若行露矣疾風勁草不其然乎與
公同杖者江翰林暉仁和人可謂杭二難云




浙江圖書館



浙江圖書館



浙江圖書館



浙江圖書館

浙江圖書館善本

甲登記號：006674

一九 年 月 日



浙江圖書館

colorchecker CLASSIC



xrite



